

新纂雲南通志卷一百九十九目錄

列傳十一 清

王國才畢金科馬濟美馬良勳

張國相尹培立

陳徽言

劉體舒

周翊

翊妻詹氏曾氏女秀姑崇恭與妻徐氏翊妻吳氏翊妻傅氏翊妻楊氏楊姝女七姑崇勛妻董氏子詩城燮崇謙妻吳氏

宋來賓

許印芳

陳思霖謝崇基

新纂雲南通志卷一百九十九

列傳十一 清

王國才畢金科馬濟美馬良勳傳

王國才字聘輔號錦堂昆明人先籍上元隨沐英來滇家焉本羅姓國才育於舅氏王遂從其姓道光壬辰舉武鄉試從平東川亂吳文鎔督兩湖檄國才自隨文鎔死黃州國才助官文守荊州屢敗敵固鄂省上游有功擢副將又攻黃州九江敵皆獲勝而以夜襲武昌奇績見稱於時是時天下承平久鄂爲四戰地尤不任城守故軍興四年而湖北軍五潰楊霈之敗也實未見敵亂民一呼而萬衆瓦解省城初才二千兵及城陷時城內外防守軍萬二千見黃旗則爭縋城走外兵亦走水師固不任城守事省城潰自保而已敵至城下用縋

城縋引而上城中惟巡撫陶恩培按察使武昌知府多山及僕從五六人恩培先赴水死多山燃城上大礮擊敵礮不發拜祝之再燃火煙出而無聲發憤自剄死布政使胡林翼按察使李益羣皆將兵赴援屯城外國才方自九江回援間關數百里夜馳抵城城閉亦用縋城縋以上至藩署敵方挾聲伎會飲重門開列火以爲燎國才乃悟城陷業已入因率親兵入暴斫之敵皆驚走且呼街巷有出者輒爲官軍所斫俄頃而定城中居民固未復業至是早盡逃國才惘惘不知所爲則登城招水陸軍不見一人明日出城合林翼屯語激昂林翼心忤焉俄而敵大至知其事者交訟國才功遂傳言國才於道獲敵諜得口號呼門而入爲讒妒者所蔽惟及見國才者知其實焉然由是荆襄上下游雖婦稚無不知有王探花所謂探花者敵自起事

來加於所遇勇將之稱惟烏泰塔齊布及國才乃得此徽號云咸豐五年四月國才屯沌口移進漢陽朝關甫築營壘漢陽敵數千出直犯朝關國才與參將恆泰擊卻之乘勝追破敵壘一恆泰中伏死國才下馬手刃退兵因回軍夾擊大破之五月攻漢陽西門佯卻距敵外穴民房安大礮敵追至相距丈許燃礮轟斃二騎及步兵百數十三里人禽斬甚多當是時漢江上下兩岸敵兵充斥巡撫屯金口倚水師自保增募二千六百人合國才等軍號六千皆恃荆襄餉給軍而漢陽敵實爲之梗林翼念相持無已時八月壬辰自將四千人渡江思合水師取漢陽不能進屯參山戊戌敵至林翼督軍出土卒要餉出怨言強之戰未交綏謀而大奔林翼憤甚索馬欲赴敵死圍人見巡撫意色惡反旋馬四五轉向空野乃鞭之馬馳不能止臨江乃

遇鮑超船諸營官聞巡撫在集潰卒調國才合屯大軍山然自是楚軍益倡勇敢其所用皆以披襟當礮石爲樂而羅澤南彭三元李續賓都興阿諸名將皆來會六年克武昌漢陽國才擢總兵七年滇省亂詔國才回滇助勦國才方統三千人轉戰斬水黃梅宿松間林翼留之詔授安義鎮總兵守黃梅與陳玉成相持百日玉成遂趨童司牌斷國才後路國才奉令移營駐濯港以禦之方運火藥間敵適至擲火彈中我藥筐藥爆發國才死多隆阿馬隊救之敵乃退詔加提督銜死事地方及原籍立專祠予諡剛介

陳繼聰方玉潤撰傳

畢金科字應侯建水人以征開化苗匪功叙藍翎外委咸豐四年隨副將王國才赴湖北破敵天門累叙至花翎都司十一月曾國藩檄令隨塔齊布攻圍九江明年正月敵犯武昌國才回軍援鄂金科遂

爲塔齊布所留自楚軍之興塔齊布實始以勇名天下塔齊布每臨敵負槍挾弓矢又令二卒樹長矛執曳馬繩竿以從其爲器也四金科臨敵負槍腰五十矢又令卒手蛇矛持八尺刀以從其爲器也亦四塔齊布躍馬颯馳噴人追從從輒返鞭之金科怒馬直穿賊陣戒後者無得妄從我人亦自不敢從也其後塔齊布戰死金科遂以驍勇冠潯軍石達開之侵江西也連陷瑞州臨江等七府數十州縣金科所至常陷陣克捷然旋爲他部牽率以致失利終不得獨錄其功自九江奉檄而南以五年十二月破敵樟樹鎮明年二月官軍敗失之自南昌而東以六年五月破敵於饒州之章田渡六月郡城陷復失之金科自痛爲他部所累益發憤募死士以舟師再入饒州誓於衆曰今日上岸破敵不捷吾不復歸舟矣一鼓克復府城饒之耆黎

婦孺見聞者與不見聞者皆曰畢公功也由是賞呼爾察巴圖魯名號補臨元鎮都司升用游擊名聲大振而忌者日以次骨金科提千餘人飢驅四戰之地索餉不至又惡忌者無尺寸功乃踞已上常鬱鬱不自得思立奇功以自旌異會徽池之敵大至值歲暮士有飢色有司者好語慰金科曰能破景德鎮軍食可圖也金科於正月二日驟攻景德鎮入市乃無一敵兵別挈壯士十騎搜勦後街敵蠶起從卒亡七人傷三人金科縱橫擊刺單騎踐羣尸潰圍出敵以木柵遮道馬不能前遂戰死年二十有五閱十有八月前從傷卒三人者收其遺骸而葬之賜卹如例諡剛毅

會國藩撰碑記 陳繼聰撰傳 李元度撰事略

馬濟美建水人祖立成鶴麗鎮把總嘉慶三年從征川楚教匪破敵於達州乘勝窮追陷伏中被執罵敵不屈敵剗其目焚其身事聞優

卹有加予雲騎尉世職父文雄由世職從征臨安江外夷匪募敢死士緣山上遂破逆寨復統兵追擊遇援賊力戰歿於陣賊支解其屍卹如例復以雲騎尉世職嗣部議准兩雲騎尉併一騎都尉濟美由世襲騎都尉隸本省督標道光八年期滿以都司用署臨元鎮左營都司奉檄勦平阿迷州匪優敘歷鶴麗鎮左營都司開化鎮右營都司中 游擊護理維西協副將擢提標左營游擊緝獲鴉片犯論功以參將用報允平南甸土目刀承緒之亂署威遠營參將升山西潞澤營參將歷署蒲州太原調撫標中軍咸豐二年金田兵由湘竄鄂河南戒嚴濟美以浦州協副將奉調防堵三年擢江西九江鎮總兵金田兵陷九江進犯南昌濟美偕巡撫張芾分軍守禦移營永和門令雲南都司戴文蘭前副將張金甲等分紮章江門外爲犄角寇屢

撲營擊敗之督兵攻城北寇營殲四百餘人寇以礮轟城城陷四十餘丈勢甚危濟美急麾兵搗寇營並分襲其後隊寇還救城得復完翼日寇復悉衆撲營濟美督兵迎敵所向披靡寇返奔追擊之深入中伏濟美奮力鏖戰身受多傷會大雨路滑馬蹶歿於陣事聞賜諡襄愍世襲騎都尉兼一雲騎尉同治元年穆宗追念濟美三世死王事忠烈萃於一門賜祭一壇子映奎映璧映斗均賜舉人映奎山東候補知府襲世職

清史
列傳

馬良勳河西人由武進士入營以千總用道光二十四年拔補元江營右哨千總咸豐二年改隸普洱鎮標奉調出征湖北三年隨按察使江忠源勦平通城嘉魚土賊復隨忠源赴江南大營助戰金田軍侵江西復兼程赴援城圍九十餘日不解大小數十戰良勳皆有功

擢都司並賞花翎金田軍旣佔九江分股擾興國撲田家鎮另以捍卒復踞安慶逼廬州良勳偕忠源回救楚北戰田家鎮不利突圍出忠源擢皖撫馳抵廬州金田軍已大至圍城數重良勳隨忠源登陣固守敵乘夜踰城壕將攀登良勳率壯士由水西門穴牆出戰敵銳甚礮子如雨良勳衝煙直撲敵營敵驚潰復踰壕夜築壘於水西門外旦良勳縋城迎擊敵匿不出良勳亦傍月牆結營與敵相持且戰且築日暮而營壘始成已而大西門月城受地雷轟裂敵衆蟻附上良勳督兵力戰卻之槍築月城立就越日敵分數千撲小東門而水西門月城迤北復爲地雷攻陷火光猛烈城身動搖良勳扼守缺口督死士力禦敵已鼓譟直上有黃衣將舉矛刺良勳良勳反奪其矛以擲之燈敵驚退城賴以全奉旨賞卓理克泰巴圖魯勇號然敵攻

益急府城糧盡援絕遂陷良勳率子弟兵巷戰手刃敵無數力竭與

忠源同日死之

清史列傳

贊曰昔清世祖入關以攻戰取中國而入旗兵卒用材武嫻弓馬擊刺驍果忍鬪天下稱無敵焉嘉道以後海疆警起而國威凌遲師稍懈矣及洪楊起事所過隳突守將潰散倉卒幾無以備而曾左始起荆南之卒轉戰江左卒成大功於是南軍聲威遠軼北師之上滇黔之卒初從胡林翼攻戰考其興跡略先曾左一時將帥若王國材畢金科朱洪章等皆以勇武顯聞著節青史此其可稱列者也其餘不可勝數何則西南邊郡迫近苗夷民俗修習戰守高上勇力出入危巖如履平夷蓋步兵之所長車騎二不當一古傳荆吳之士輕慄便步今其氣俗猶略存耳

張國相尹培立傳

張國相龍陵人由行伍隨勦楚蜀教匪有功拔補把總嘉慶五年提督烏大經勦夷匪於廣西國相首先躍過賊濠克逆寨擢開化右營千總七年檄勦維西夷匪五月敗賊於大石山喇嘛寺六月進攻磨盤山疊破賊洞八月追賊於核桃箐深入被圍力戰乃得出十二月復敗之於小甸河毀賊九壘八年正月又敗之於李子坪餘匪竄峩底山國相與都司戴雄帶兵分路入山搜勦擒斬略盡惟首逆恆乍縹率死黨遠竄旋糾怒匪野夷復竄踞江外之橄欖山三月官軍過江追勦圍之數重國相力戰七晝夜盡燹股匪恆乍縹遁獲其妻子國相面傷於弩猶奮力戰以守備用賞藍翎已偵知恆乍縹匿栖陀羅箐總督琅玕飭國相冒大雪倍道馳勦掩賊不備生擒恆乍縹其

黨殲焉維西平九年補臨元鎮中軍守備十五年升陝西鄜州營都司豐陞至洮岷協副將道光六年七月喀什噶爾張格爾叛七年隨揚威將軍長齡參贊大臣楊遇春西征勦賊於洋阿爾巴特莊官軍三道進國相以所部出中路短刃相接殲悍匪千計追至洋達馬河賊復悉衆迎拒大敗之賜花翎三月渡河攻克喀什噶爾城擒逆酋阿布都拉等張格爾逸上以命將出師期殲元惡乃臨巢兔脫棄前功留後患長齡楊遇春受詰責國相旋從楊遇春進攻和闐至雜古牙爾沙梁殲擒悍賊三千有奇以次復和闐英吉沙爾葉爾羌三城久之偵張逆竄匿木吉國相隨固原提督楊芳出卡搜勦行抵赫子爾達巴罕遇賊迎擊之張格爾走浩罕不納乃傳食諸部落諸部落漸不能供生計日蹙時中國購禽獻張格爾者爵郡王金十萬十二

月長齡等密遣黑回出卡縱反間言官兵全撤喀城空虛諸回翹首以望和卓其白回從賊出卡者家室皆令無恙以離其心張格爾果復率步騎五百欲乘官兵除歲不備入卡煽衆潛襲喀城長齡楊芳嚴兵六千以待二十有七日賊由開齊山舊路潛入阿木古回城白回奔竄黑回要拒賊知有變即折奔出卡楊芳率兵三路星夜追至喀爾鐵蓋山擊斬殆盡張格爾棄騎登山擒之回疆平國相先後屢以功議敘凱撤還任調安西協副將十年九月喀什噶爾回復糾衆劫掠總督楊遇春檄國相帶兵往勦至喀什噶爾城城圍已解搜戮東西兩路餘匪殆盡遇春以國相從征久勞績著奏請以總兵記名簡放擢山東曹州鎮總兵升福建陸路提督調貴州二十五年國相以傷病發奏請開缺並請入籍貴州明年卒賜卹如例諡壯愍子文

奎四川布政司經歷

清史館傳

尹培立昆明人道光十五年武進士以衛守備用改營千總疊陞至陝西鞏昌營游擊署略陽陞撫標中軍參將咸豐二年署潼關協副將陞甘肅金塔寺副將時金田軍方出湖南連陷郴州桂陽陝甘總督舒興阿奏遣培立偕總兵福誠率陝西兵二千赴援七月抵長沙聞敵由郴州竄撲省城即移營石馬舖以扼之而敵衆數千自醴陵猝至培立迎擊卻之踰日敵衆麇集撲營培立與福誠分路出鏖戰半日敵敗退官兵追擊之敵已豫伏大股由間道襲營後培立撤兵回救前敗者乘勢反攻官兵腹背受敵遂大潰營壘盡失培立偕福誠陷入重圍短兵接轉戰多時均力竭歿於陣湖北巡撫羅繞典奏聞賜卹如例諡簡毅入祀昭忠祠予騎都尉世職

光緒志

贊曰張國相沈毅剛摯爲時虎臣掃蕩回疆馳驅龍磧執訊獲醜功在廟社尹培立勇而有謀固節不移馬革裹屍終踐素志孔子言志士仁人無求生以害仁有殺身以成仁培立有焉

陳徽言傳

陳徽言字炯齋劍川人父宗魯季父師魯皆以進士分官中外徽言以諸生爲國子監典籍用軍功保舉通判咸豐丁巳禦敵江西東鄉力戰陣沒事聞詔以道員例賜卹入祀昭忠祠時年未及壯也初徽言隨父由京師旋滇道鄂渚父病僑寓武昌其時楚南烽燧告警湖北大吏籌辦堵禦路阻絕不通無何父沒以長沙敵氛惡慮洞庭水程梗未敢扶櫬南歸迺權厝柩東郊未幾敵解長沙圍連陷益陽寧鄉岳州進屠蒲圻率水陸數萬衆直擣武昌巡撫常大淳徽言季父

同籍友也往謁陳方略言敵水陸並進輜重必盡在舟今日急務當先斷其舟路陸路則有援兵尾之我惟固守城之東南方敵無所逞其狡矣大淳曰斷之若何曰長江之險我能獨據上也與敵共之次也若無兵守棄之與敵非計也曰江險我何絲據曰跨江紮旛爲浮橋簡精銳嚴守其上則武昌漢陽二城對峙中通一營聲援聯絡敵舟自不敢順流直下文昌平湖漢陽等門守陴兵勇藉此亦可少減而於武勝門至大隄口江岸駐兵數百首尾相顧勢成犄角長江之險爲我有矣大淳沈吟有頃復問其次曰其次惟有文昌門至大隄口沿江列巨礮駐兵千三百人文昌平湖二門三營營三百人漢陽門逼臨江岸百人已足而下餘三百人以之營大隄口凡上下流大小舟悉清查泊岸一隅備臨時用庶乎天塹我與敵可分據大淳慮

兵力羸弱提督雙福亦陰主兵柄不欲留一戰士在外大淳遂決意守城徽言歎息而退遂不復談兵事比城陷大淳倉卒引絕文武吏多力竭自裁者城中死者枕藉徽言悲憤求死家人環守謂汝死則宗祏墜何忍使亡親爲異鄉餒而之鬼廼匿一小樓乘間渡江得免於難徽言自束髮隨分遊歷四方稍長隻身走齊魯燕趙年甫二十而足迹已半天下其季父官楚伯兄官粵每往來省視故中間居南方日尤多其後兄沒於寶安復奔喪赴粵久客不得歸於是有南越遊記之作僑寄武昌身丁喪亂於是有武昌紀事之作南越遊記則南海張維屏爲之序山陰李濂爲刊而行之武昌紀事則其沒後爲樵李吳昌言重訂補刊而新寧江忠源南豐吳嘉賓爲之序所著有湖海詩集亂後散佚昌言就所記憶者附於武昌紀事之末英光浩氣藉以不墜可悲已徽言殉難後其妻宋氏在浙聞耗仰藥自盡無子重可悲也

武昌紀事
南越遊記

贊曰世皆謂書生游談不足以臨敵濟變觀於徽言豈其然乎方武昌破時徽言以羈旅孤兒不忍憤憤之心求一死而不可得卒迺發憤於東鄉之戰不惜破絕筋骨糜一身以報君父蓋義烈之氣鬱塞於胸中者久矣

劉體舒傳

劉體舒字雲巖景東人道光癸巳成進士以即用知縣分發直隸丁父憂回籍二十三年服闋揀發廣西署養利州知州補鬱林直隸州知州咸豐四年簡放思恩府知府調署潯州府事體舒官廣西久所至有聲時潯州艇賊梁培友大口昌縱橫水面聞體舒履任遂就撫

已而叛去糾合貴縣賊趙洪李七等率衆數千犯郡城體舒分兵截其歸路戰於西關擒斬千七百餘級餘黨仍退距貴縣五年粵東賊李文茂陳開起事佛山攻陷肇慶遂溯江西上犯潯州培友等與之合敵萬餘晝夜環攻體舒率官軍士民登陴固守屢出兵擊之互有殺傷敵於南城外築土墻絕城中餽道七月十五日穴地攻小南門陷其郭敵蟻附上官軍矢石雨下斃敵數百始退去體舒血書請援兵八月初六日按察使張敬修與參將尹達章自平南督水師至石嘴與敵戰失利去敵知糧盡援絕攻愈急十七日敵悉銳撲南城架雲梯上攻官軍饑疲不能拒城遂陷士民巷戰死者甚衆體舒與桂平縣知縣李慶福卸縣事舒樺均被執不屈死經歷宣元煊自縊於署典史沈廉赴水死事聞體舒贈太僕寺卿銜餘皆議卹有差

廣西昭忠錄

贊曰體舒非徒死者也其始也賊甘就撫奪於先聲耳既叛也斬首至千七百餘級可云勇矣卒以援絕被困巷戰而死烈矣哉

周翊傳

翊妻詹氏曾氏 女秀姑 翊妻楊氏楊氏女七姑

崇恭與妻徐氏 翊妻吳氏 翊妻傅氏 崇勛妻董氏子詩誠 崇謙妻吳氏

周翊字順雲昆明人先世居江西豐城縣高祖文先本姓甘以與周氏中表親出繼周後遂承其姓游幕入滇因籍昆明曾祖延祚年八十六嘉慶元年恩賜品服粟帛子肇岐肇渭肇豐肇岐廩貢生子德銘德芳德玉德駿德芳子六人曰翥曰翊曰翊曰翊曰翊曰翊娶於詹繼娶於曾曾無出詹生子男崇恭子女五人翊性肫摯操商業而有士君子行同治初元滇亂作巡撫徐之銘主撫賊酋皆授官有差癸亥正月十二日馬榮挾衆入城總督潘鐸慮其變屢促之出時翊姪崇勳爲祿勸校官聞省城危甚遣力來接家往避力以十四日

至舉室方治裝不卽發十五日馬榮遂戕鐸雲南府知府黃培林昆明縣知縣翟怡曾等殉焉縱黨四掠全城大震有舉火自焚者時翥與翹翹皆早沒翹需次京師獨翹與翹家居聞變扃戶自匿俄有隣婦被鹵翁姑乞求省釋慘不忍聞翹乃語家人曰事急矣可若何吾家世清白義不爲賊辱且今食毛踐土猶有仕而食祿者則死國事分也亦義也因長跪兄前曰承先啓後兄任之弟以身殉決矣婦孺亦宜自裁兄方掩泣不能語翹已出藏酒和礮以待曾氏請先飲翹笑曰何先爲遂俱飲舉家二十人咸次第飲其第五女才八歲見父母飲亦取半盃飲立盡初不知味之辛烈逾時身心如焚即昏暈僵臥恍惚中間賊破門聲甚厲比搜牢旣去聞堂上歐吐呻楚欲起視竟莫能興其甦者則髮縷盡溼乃知戚族來救浸之水中而不及

救者十四人則翹夫婦也第四女秀姑也崇恭妻徐也翹妻吳翹妻傅也翹妻楊奄臥旬餘至二月二日始沒楊氏有姝女曰七姑以新年省姑亦同殉而崇勳妻董與其三子曰詩曰誠曰鑾年皆未滿十齡昏瞽中猶喃喃誦所讀書崇謙妻吳且有身七月其狀尤慘云其因救獲甦者則翥妻陳翹少子崇光女六姑崇仁妻陳崇勳長女暨翹第五女共六人亂定後邑之耆老具以全家死難事上有司請於朝得旌如例翹之第五女者前翰林顧視高之母也視高在詞館以本秩貤封翹爲通議大夫侍講銜翰林院編修翹妻詹曾皆爲淑人又與諸舅立祠爲記以刻麗牲之石

周氏祠堂碑記

贊曰人民之於君國上以仁義孚下以仁義酬其有暴力相加者雖婦孺猶將抉瓦石以投之不足則効死而無尤焉故僭竊者不敢俟

而殘酷者不敢讎藉非然者此仆彼張維力是王則亂臣踵亂疆隣
倣疆而國以亡矣詩曰戎狄是膺荆舒是懲若明之薛大觀清之周
翊者我國人抵死抗敵之徵也豈以忠於一姓而見稱哉

宋來賓傳

宋來賓字寅谷昆明人父禧卒時來賓甫四歲母氏楊以績奉翁姑
使就讀來賓性純篤而絕慧弱歲能文未冠祖父母相繼歿哀毀盡
禮事母以孝稱道光己酉領鄉薦庚戌成進士以知縣籤分甘肅即
用補玉門歷署兩當隴西禮金四縣寧階靜寧三州所至慈惠愛民
多善政而抗直敢決能任大事同治壬戌匪亂大吏以其曉暢戎機
由玉門調任寧州時州城已戒嚴來賓毅然赴任然承平既久人不
習兵於是招集團練自製木礮繕守具晝夜登陴尤以拊循瘡夷固
結人心爲捍衛地方之本時提督某以善戰名統兵駐隴東軍食所
需派諸地方寧號富庶員弁苛擾無虛日民不聊生來賓白提督請
自任催徵已報可而兵弁狃於積習擾如故來賓怒擲冠於几曰吾
官可以罷免吾民不可擾也立擒強橫者治之州界肅然提督大憤
欲奏劾卒以來賓剛正負時望莫能中傷也一日忽報敵大至距城
二十里來賓帕首執戈上馬率健卒數百爲迎戰計居民聞信羣集
街衢跪而泣阻不令出來賓問故僉曰敵勢方盛我軍僅有此數公
身爲生靈所託命設不利全城休矣來賓歎曰吾豈不知衆寡勢殊
特恐守之不堅終難倖免故欲奮鬥以一死報國耳今徇汝等請姑
再支數日決進止居民皆慷慨奮發矢願堅守敵聞有備始引去總
督熙麟之督師慶陽也重其才每事必諮適驍將范銘援平涼失律

將置於法來賓曰赴援不止范銘一軍伏法僅止范銘一人非公道也宜貸其死熙不可來賓曰吾恐死者不瞑目矣拂袖而出熙雖疾其戇而范銘竟以此獲免他日來賓有書復陳勦撫之策熙批其牘尾曰本部堂一佔畢小儒耳後有所見仍當續言無隱其始終倚任如此棗社鎮者州之巨市也其名自唐時已然距北吉原回堡最近乃殊諭其酋曲盡開導約期面商安撫之法屆時帶僕從十餘人往酋出迎然盛列戈矛槍礮其黨如林以吼聲壯其聲勢從者失色來賓下馬入座從容宣布國家威德曉以順逆之理神氣自若酋服其膽誓不侵犯自壬戌以迄甲子凡二年終其任卒保危城大吏以力捍危疆入告得旨賞花翎以同知直隸州升用比解組父老流涕送者萬餘人旋以移疾就醫關中大吏強起之庚午權篆階州適已革

副都統桂某潰兵千人盤據境內索餉糧閱年餘矣州人疲於供應漸不支少違其意則鞭撻勒拷酷虐備至一日營員某索餉急來賓曰汝等潰兵何餉之有毋多言速去爲便某曰無餉變矣來賓曰變亦聽之某忿然歸營而來賓已登城移大礮相向且使人告曰汝等變則轟之否則整隊出城勿遲戀某軍大駭方將抗拒而來賓密調之黑頭勇已至黑頭勇者皆狄道河州人帕首以黑驍勇善戰故得名時方駐紮鄰境其統領即范銘也聞信星夜疾馳得無誤某軍氣奪拔營踉蹌而去州境始安光緒元年卒金縣官署年五十九子二之京進士戶部主事之章甘肅狄道州知州

贊曰來賓仁孝君子也其任事之勇決與對人之忠直皆其仁孝一念之所發耳近人或云處今之世宜多言勇少言仁多言忠少言孝

其謬誤實甚不知道德與條律異由內發非外爍以血氣爲勇以意氣爲忠是孟子所謂七八月之間雨集溝澮皆盈其涸可立而待者也果其根於至性源於至誠則未有仁而不勇孝而不忠者觀於來賓可知矣先聖有言仁者必有勇又曰戰陣無勇非孝也莅官不忠非孝也仁孝可爲忠勇斯理也放諸四海而皆準質諸百世而不惑豈因時地而異其本末輕重哉

許印芳傳

許印芳字節山一字麟篆石屏人性倜儻目光炯炯如炬自幼博涉流略工文事事父母以孝聞妻死不娶沈酣寢饋經史中數十年如一日同治庚午舉鄉試第二歷任昆陽學正永善教諭昭通大理教授五華書院監院經正書院山長所入祿俸均以之搜刊前哲詩文

先是嘉慶初保山袁文典文揆曩季刊滇詩文略乾隆前古作者吉光片羽賴以不墮咸豐初昆明黃琮刻滇詩嗣音集則道光以上風雅之什略備旋燬於兵大亂既平文物凋喪學人間作雅音未衰率以無力繡梓旋就湮佚印芳於是輯光緒以前滇賢之文踰十家詩踰四十家先刻詩編仿黃氏例命曰滇詩重光集都十六卷嗣是續得五十餘家留稿以待後之人全滇古今文獻彬彬矣印芳所著有詩法萃編詩譜詳說律髓輯要五塘詩草五塘雜俎都若干卷先是當咸同之交印芳目覩文恬武嬉而姦頑奮張知大亂已成哀身世之世離感斯人之無與拯卹往往中夜起立慷慨悲歌至光緒初兵禍漸定而海軍又棘益知株守不足以圖存道在通方達變以求切合於時用故其主講經正書院也汲汲以經世之學詔後進而東西

各國政治藝學一任學者觀覽立身行己雖不苛細行然而綱常之大名教之防未嘗不凜凜也主講凡六年而卒當道先後疏其學行以聞加內閣中書銜後賞五品頂戴云錢用中撰墓表 王先謙撰滇詩重光集序及五塘詩草序贊曰許印芳履躬清素文藝贍博輯佚綴遺表顯耆舊滇南文風賴以不墮及其憂國傷亂昌言經濟之略綜稽名物切陳救時之務知機達變足以垂教來茲開物成務亦近古豪傑之士也豈與夫兔園書生挾三寸毛錐者可同日而語哉

陳思霖謝崇基傳

陳思霖字應農楚雄人年弱冠補博士弟子員清咸豐庚申之亂楚雄被陷馬如龍殺官紳士庶男女四萬餘人思霖幸免於難亂定後銳意學業博通經史癸酉補膺辛酉選拔科闈登賢書丙子成進士

選庶吉士散館授編修歷充壬子順天鄉試同考官國史館協修功臣館纂修南書房行走宏文學士京察一等計服官京師一十九年皆忠於其職以清操著光緒己丑思霖倡首約同鄉京官具疏已故湖南提督馬如龍先年在滇反叛功不掩罪請援例撤銷建祠立傳等詞呈請都察院代奏疏文洋洋千數百言大要謂馬如龍受杜文秀密約糾黨數千先陷易門廣通攻破楚雄殺斃官民四萬餘人恣意焚燒淫掠知府楊覲副將慶連都司聶天發及在城文武官二十餘人同時被害屠戮之慘莫此為甚又馬如龍在省首鼠兩端徘徊觀望經岑毓英分派李維述楊玉科等攻拔大小賊營二百餘座擒斬賊匪十數萬省圍乃解亦非馬如龍一人之功今以彼荼毒生靈前愆難贖之身儼然馨香饗報恐無辜被殺之數萬人飲恨九泉死

不瞑目即風示來茲亦難稱公道於人心而昭定論於後世疏聞奉旨撤銷建立專祠其盡忠桑梓若此所著奏疏一稿勒石於縣忠義

祠

探訪

謝崇基字履莊恩安人光緒壬午舉人丙戌成進士選庶常授檢討充雲南留日學生監督德宗實錄館纂修官京察一等特授天津道調署清河道辛亥國變不出隱居天津與嚴修契以唱酬相往還癸亥終於天津貧無以為殮辮髮猶未薙也時年六十一著有兩漢洗

齋詩文集二卷

方樹梅著
演賢像傳

贊曰思霖侃侃能言人之所不敢言可謂壯矣陳太史虛齋文集載其官京師時嘗見思霖書室懸一寶刀精光射人笑謂曰老前輩儒者奚事藏刀為應曰此吾之斬馬刀也必待時而用此可以見其豪氣矣崇基國變不出窮餓自甘叔季得此亦非易哉